

DOMENIE XIX «VIE PAL AN»

Antifone di jentrade cf. Sal 73,20.19.22.23

Ten fede, Signôr, a la tô aleance,
no sta dismenteâti par simpri de vite dai tiei biâts.
Jeve sù, Signôr, e pare la tô cause,
no sta dismenteâ lis suplichis di chei che ti clamin.

Colete

Diu onipotent e eterni,
che si permetin di clamâti cul non di Pari,
colme tai nestrîs cûrs il spirt di fis d'anime,
par che o podin jentrâ a gjoldi l'ereditât imprometude.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE 1 Re 19,9.11-13

Sta su la mont denant dal Signôr.

Dal prin libri dai Rês

Rivât Elie su la mont di Diu, l'Oreb, al jentrà tun landri e al restà dute la gnot. La peraule dal Signôr si fasè sintî cussì: «Salte fûr e sta su la mont denant dal Signôr». E ve che il Signôr al passà. Si sintì un grant burlaç, tant fuart che al scjassave lis monts e al spacave i crets denant dal Signôr, ma il Signôr nol jere tal burlaç. E daûr dal burlaç un taramot, ma il Signôr nol jere tal taramot; e dopo dal taramot un fûc, ma il Signôr nol jere tal fûc; e daûr dal fûc un sunsûr di un aiarin lizêr lizêr. A pene che Elie lu sintì, si taponà la muse cu la manteline; al saltà fûr e si fermà su la jentrade dal landri. Peraule di Diu.

SALM RESPONSORIÂL dal Salm 84

R. Danus, Signôr, la tô presince di pâs.
O vuei scoltâ ce che al dîs Diu;
il Signôr sigûr di pâs al fevele
pal so popul e pai siei fedêi.
Sigûr che la salvece e je dongje
par chei che lu rispjetin;
la sô glorie e tornarà di cjase te nestre tiere. R.

Bontât e fedeltât si son strenzudis,
justizie e pâs si son bussadis.
La fedeltât e menarà sù de tiere
e e cucarà jù dal cîl la justizie. R.

Di fat il Signôr nus darà ogni ben di sorte
e e butarà il so prodot la nestre tiere.
La justizie e cjamine denant di lui,
e su l'olme dai siei pas la dretece. R.

SECONDE LETURE Rm 9,1-5

O bramarès di jessi taiât fûr di Crist pal ben dai miei fradis.

De letare di san Pauli apuestul ai Romans

Fradis, o dîs la veretât unît come che o soi a Crist; no dîs bausiis e la mê cussience mal conferme in union cul Spirtu Sant: o ài grant dolôr, un aviliment tal gno cûr che nol soste. Di fat o bramarès di jessi maledît di Diu, taiât fûr di Crist pal ben dai miei fradis, che a son de mê stesse gjernazie seont la cjar. Di fat lôr a son Israelits, e je lôr la fiolance di anime, la glorie, lis aleancis, a lôr ur è stade dade la leç, lôr al è il cult, lôr a son lis promessis, lôr a son i patriarcjis, di lôr al salte fûr Crist par chel che al rivuarde la sô nature umane, lui che al parone dut, che al è Diu e benedît tai secui.

Amen.

Peraule di Diu.

CJANT AL VANZELI Sal 129,5

R. Aleluia, aleluia.

O speri, Signôr;
o spieti la sô peraule.

R. Aleluia.

VANZELI Mt 14,22-33

Comande che o vegni ancje jo fin li di te su l'aghe.

Dal vanzeli seont Matieu

Passude la fole, subito dopo Jesù al ordenà ai dissepui di spesseâ a montâ su la barcje e di lâ denant di lui sun chê altre rive, intant che lui al varès mandade vie la int. Ma, finît di mandâ vie la int, al lè su la mont, fûr di man, a preâ.

Rivade gnot, al jere li di bessôl, biel che la barcje e jere cualchi mie lontane de tiere, sbalotade des ondis; che di fat al jere l'aiar contrari. Sul cricâ dal di Jesù al vignì viers di lôr cjaminant sul mâr. I dissepui, viodintlu a cjaminâ sul mâr, a cjaparin un grant spac, scrupulant che si tratàs di un fantasma, e pe pôre a tacarin a berlâ. Ma Jesù ur fevelà subito disint: «Fasêtsi il cûr fuart, o soi jo; no stait a vê pôre!». Alore Pieri lu preà disint: «Signôr, se tu sês propit tu, comande che o vegni ancje jo fin li di te su l'aghe». E lui: «Ven!». Alore Pieri al dismontà de barcje e al tacà a cjaminâ parsore da l'aghe lant de bande di Jesù. Ma viodint che l'aiar al soflave masse fuart, lu gafà la pôre e, stant che al tacave a lâ sot, al berlà disint: «Signôr, salvimi!». Jesù al spesseà a slungjâ la man, lu cjapà e i disè: «Om di pocje fede, parcè mo âstu dubitât?». Montâts su la barcje, l'aiar al cessà. Chei che a jerin su la barcje si butarin in zenoglon denant di lui disint: «Tu sês propit il Fi di Diu!».

Peraule dal Signôr.

Su lis ufiertis

Acete di bon voli, Signôr, i regâi de tô Glesie,
che tal to boncûr tu jai âs consegnâts par che tai ufrissi,
e cu la tô fuarce fasiju diventâ il misteri che nus salve.
Par Crist nestri Signôr.

Antifone a la comunion Sal 147,12.14

Jerusalem, dai glorie al Signôr,
cu la flôr dal forment lui ti sostente.

O ben: cf. Zn 6,51

Il pan che o darai jo
e je la mê cjar, par che il mont al vivi, al dîs il Signôr.

Daspò de comunion

La comunion cui tiei misteris
che nus salvi, Signôr,
e nus confermi te lûs de tô veretât.
Par Crist nestri Signôr.